

欽  
定  
全  
唐  
文

欽定全唐文卷九百六十三目錄

闕名 四

上太上皇及皇帝尊號表

賀收劍門表

請加尊號表

賀黃河清表

蘇州賀赦表

請上尊號表

再上尊號表

上慶成節表

請上尊號表

請仍以國忌日行香表

賀殿前穿井得甘泉表

上嘉會節賀表

賀朱全忠進白兔表

爲王尚書遺表

代鄜州太守賀赦表

請更定選曹事例表

請建宗廟表

上嘉慶節表

上永壽節表

上天清節表

爲李諫議賀赦表

欽定全唐文卷九百六十三

闕名 四

上太上皇及皇帝尊號表

永貞元年十一月宰臣

臣聞帝堯之禪虞舜也業歸於異代漢祖之尊太上也禮循乎虛名未有履尊極而捨萬乘之榮奉晨昏而傳七廟之重斯則堯圖未遠漢道未全倬然冠洪名而超古昔者孰若今之盛也伏惟皇帝陛下誕受聖姿欽膺寶厯自天生德與神契合近者太上皇恭默在疚禪受未行萬國注心思言堯以致理羣生屬望渴聖人之利見陛下忠感於

天地孝達於神明成堯舜之內禪固邦家之景命功莫盛於配天孝莫大於寧親讓莫高於傳聖故太上皇釋天下之負所以成其讓陛下受宗祧之寄所以保其功惟文王爲無憂惟武王爲善繼夏祀永固周命維新巍巍蕩蕩固無得而稱矣又聞皇帝之道必體於至公稱號所加不私於爲已將體元以立政必紀年以垂號伏願肇茲獻歲允極鴻名發揮元功昭示景化則太上皇之德可表於徽冊陛下之孝克施於寰海然後父父子子君君臣臣仰東海者知聖化之深躋南山者願聖人之壽臣等不勝大願請

上太上尊號曰應乾聖壽太上皇請上陛下尊號曰文武  
大聖孝德皇帝因三正之慶會鼓萬國之歡心奉寶冊以  
薦鴻徽率羣臣而朝上日然後退自問寢列茲充庭先陳  
教孝之儀方受慶君之禮斯實邦家之耿光也古今之絕  
典也雖朝賀有次已稟於綸言而徽號所尊益勤於俞詔  
兆人懇願罔不喁然

賀收劍門表

元和元  
年二月

臣某言伏見正月二十九日制書以劉闢擢於非次授任  
節旄不立朝章擅有侵軼詔命左右神策行營節度使高

崇文領馬步將士嚴礪李庸等計會討伐臣又得上都進  
奏院官高振報嚴礪下告捷官嚴公既奏正月二十二

一作

三日收復劍門破賊五千斬偽授劍門刺史武德昭訖又

夏州叛將楊惠琳援絕城孤勢窮力屈王師進襲計已剋

平凡在遠邇不勝慶幸臣某中賀伏惟皇帝陛下誕敷元

德廣被文明寰海乂寧戎夷款附蕞爾狂狡敢縱奸兇藉

方伯任用之資乘軍城變故之際阻兵拒命肆虐讐鄰陛

下志在安人尚爲含垢項令申諭許以自新誠宜改過感

恩迷而知

一作不非

復而乃恣情干紀長惡不悛旣慝稔而禍



盈俾人怨而神怒今戎臣授律睿畧遐宣迫脅者知有所  
歸忠義者得以自効因利乘勝犄角攻驅固無遺鏃之勞  
佇見輿尸之變臣忝職藩服受任偏師憤激之誠倍百常  
品無任踴躍之至

請加尊號表

元和十四年五  
月中書門下

臣聞惟帝之尊不言而理惟天爲大無得而名所以舉鴻  
徽昇大號者體乾坤之心也伏惟睿聖文武皇帝陛下璿  
樞御柄氣母躋神總三靈以紀元宅萬國以鋪化霽日出  
海雄光照天烟霞變舒草樹動色夫纂大寶者重光之德

崇張帝圖者屬統之功盛十聖儲祉貞明下土一天鏡開  
引耀幽蟄此臣所以稽衆心而窺景鑠者也臣聞孝於其  
父則導善因心忠於其君則望美終日蓋性本於內義激  
於中將曲成以無違期取實而不苟所以然也陛下粵臨  
宸極十有五年道本至公誠深馭朽有盡下之意無自我  
之規以喜怒之氣調陰陽之德比類百則有帝堯之聰明  
周旋一心秉神禹之恭儉繇是朔陞之兇以謀勝庸蜀之  
虜以刑誅徐夷之固以德歸吳寇之強以氣滅茂昭以二  
郡至宏正以全部來幽鎮無聲滄景交代至若從史執縛

宗奭明刑語於大朝斯爲細事項自淮淝稔禍海岱奮妖  
厯五聖而不龔稽四紀而負恃陛下英威電斷睿畧風行  
決必取於天心示不疑於輿聽此忠賢所以盡力猛毅所  
以捐軀一舉而元濟受擒再動而師道傳首地維自正天  
下一家六十餘年不聞此事野老擊壤仁風扇和巍巍成  
功蕩蕩區域遠可以比崇於唐虞軒頊近可以不顯於高  
祖太宗且元宗自先天三年至天寶十三年四十年間六  
上徽號今陛下發揮元祉燁赫洪猷摠積憤於祖宗駕千  
齡於天地飾文武之氣象納廣大於昊穹澤及隱微仁霑

動植圓方不足稱其遠辰象不足契其明瑞舞神魚祥升  
鳴鳳若不駿尊大號仰陟鴻名豈非臣下之愿與臣等是  
以夕惕夙夜翕肩累息上探元命下採羣情不勝懇戴誠  
願之至謹上尊號曰元和順天應道聖文神武皇帝以崇  
莫大之業以配無爲之功伏惟陛下奉順人靈俯從公議  
鑒深誠於億兆顧景貺於神祇喁喁四海孰不踴躍

賀黃河清表

元和時

臣某言臣得進奏官狀伏承河陽奏汜水西界從洛口黃  
河清一百六十六里又橫海軍奏界內黃河清澄徹分明

者臣聞聖人在上天下和平風雨時若則海波不揚黃河  
清夫土所以載水水所以利物天意鍾土德之道開水瑞  
之華符我上聖祥於下土中賀伏惟睿聖文武皇帝陛下  
蹈十聖之原軌陳一王之大法垂衣裳以朝萬國舞干羽  
而來四夷平泰階於天躋偃師節於靈臺故得濁波渾渾  
千載一清長瀾浩浩百里如鏡氣新天宇光澈地脈仰分  
萬象之法中涵千聖之德初澄海裔表陛下橫恩波於海  
上再清洛口助陛下鋪文明於土中二十八日兆陛下告  
成之日也百六十里期陛下得聖之數也臣謬承分間之

金史卷之三  
寄叨榮持節之權生當海晏之年幸識河清之日未奉明  
詔不敢擅離軍府詣闕隨公卿蹈舞明庭下情無任西望  
踴躍之至

蘇州賀赦表

臣某言伏奉二月十三日勅下垂拱臨軒親受典冊大赦  
天下與人更始中賀伏惟元和聖文神武法天應道皇帝  
陛下用人情爲田播殖萬類細徹微妙靈通幽神洗盪危  
疑開釋罪罟酬勞而傾盡府帑貶用而大減租入逋負除  
而餒者自活力役省而耕者倍功繼絕存亡忠賢飲德於

黃壤棄瑕肆眚奪魄再麗於遺骸極天地之歡心盡帝皇  
之上事疲史臣之筆編簡難書涸詩人之思謳謠絕路臣  
總集黎老伏讀德音不寤微生坐階仁壽不勝慶抃之至

請上尊號表

長慶元年四  
月中書門下

臣聞上帝至尊也其名有九所以顯高明之位西方大聖  
也其號有十所以旌神化之功王者提寶運而光宅握瑤  
圖而首出必建徽號以稱鴻猷斯乃臣子之誠有所法則  
天之所與不可辭讓伏惟皇帝陛下欽明御歷神武纂戎  
挺上聖之姿撫中興之運鼓雷霆而清八極懸日月而照

九圍粵若祇事郊廟敬養長樂大孝也省刑責已偃革息  
兵大澤也慶雲見甘露降羽毛呈瑞草木發祥天符也億  
兆歡心而太和蠻夷蹶角而威服人瑞也祖宗未賓之地  
帝王不收之吐皆勿耀天威獨運聖算未嘗血一刀勞一  
夫文軌罔不同桀驚罔不化則軒有版泉之戰堯有丹浦  
之征求之往籍彼宜慚色陛下有格天之大勲動天之  
大德徽烈已冠於前古而稱號猶抑於當今凡在朝野敢不  
知罪臣等不勝大願伏乞迴天眷啟宸衷擇吉日崇徽號  
塞人祇慊慊之望合夷夏喁喁之誠



表名者德之光所以配天立極傳於億祀表功明德示於  
四方伏惟皇帝陛下運啟中興業隆大寶總道德而施教  
法陰陽以爲心雖日昃忘勞之規馭朽興念之戒身衣弋  
絺之儉乙夜觀書之勤斯皆前代之令猷而哲王之懿範  
有一於此則爲聖明陛下總而行之孜孜不倦而又抑退  
浮薄崇獎貞廉必齊素厚之風每尚儒學之本端靜邁於  
時俗孝愛浹於人倫掃滄景之妖兇定羌蠻之僭據去華  
尚樸先自六宮端本澄源行乎四海近者旱暵偶數時雨  
稍愆陛下切納隍之憂深在予之責德音纔發靈貺已隨

變慝消災有如影響熒惑受制以軌道壽星叶紀以揚光  
品彙昭蘇風雨時若元功之化覆載同和成貸之仁肖翹  
皆遂干戈載戢華夏以清自三代以還仁明聰聖未有如  
今日之盛者也而自龍飛代邸將及十年聖德咸通鴻名  
久曠何以彰祖宗之盛軌副億兆之懇誠臣又聞行過乎  
恭自非中道名以出信斯蓋格言使尊稱抑而未揚大典  
闕而不舉天地之符未答神祇之望莫申臣等不勝大願  
謹上尊號曰太和文武聖神皇帝伏惟誕膺丕典永峻鴻  
猷葵藿纖誠庶傾心於迴照犬馬微志獲蹈舞於康衢無

任恂款屏營之至

請仍以國忌日行香表

開成四年十月

國忌日天下依舊不舉樂不視事不鞭笞伏以道釋二教  
澶漫虛無陛下靡所歸依誠契至理但以列聖忌日行香  
及茲修崇示人廣孝兼以天下州縣不舉樂不視事不鞭  
笞以此海內蒼生當知列聖廟號今既停罷行香之後勅  
內又無其日徹樂廢公止行如舊之文伏恐遐遠之地迷  
其所向便與居常之日率皆無殊臣思此事終關聖慮禮  
曰君子有終身之憂而無一朝之患故忌日不樂謂不舉

吉事也伏以陛下聖睿留想若以設齋資福事損不經起  
今罷之已有詔旨其曰天下州縣不舉音樂不視公事不  
行鞭笞伏請重下明制依前遵守則凡在遐陬逮於蠻貊  
不忘廟號有裨孝理之源

賀殿前穿井得甘泉表

文德元  
年九月

臣聞至德動天天乃垂甘露神功浹地地故出醴泉然猶  
兆自郊圻啟諸甸服未有因於改井得彼甘泉不離禁掖  
之中便是殿庭之側澄清若鏡汲引而固絕羸餅香美如  
飴濟利而終期勿藥沉銀床萬所玉甃千門味不足以和

太羹美不足以調甘食若非皇帝陛下幽通并德明契天  
宮則何以草故從新致斯元貺移鹹變苦降此休禎臣等  
幸偶盛時叨塵寵祿思與堯年野老鑿以興歌願得漢水  
丈人汲而成藥

上嘉會節賀表

龍紀元  
年三月

臣聞聖人受命天必降其殊靈王者應生國必蒙其介祉  
故華渚有流虹之異元樞呈大電之祥而皆近感神明遠  
符乾象叶千年而啟運契六合以居尊伏惟皇帝陛下德  
邁方圓道融三五因社鳴而正位逢并聚以樂推膺彼昌

期宏茲丕構今者發生司律厯數在躬值清明馭氣之時  
當仁壽悅隨之始固可年同鶴算歲比山呼永符垂拱之  
風長保後天之慶

賀朱全忠進白兔表

天祐元年九月  
月中書門下

今日東頭承旨常郁至奉聖旨者質素光而應候容潔朗  
以協時旣照耀於明庭實昭彰於聖德臣等覽晉中興書  
徵祥說曰白兔者月精也抱朴子云兔壽千歲滿五百歲  
則色白顧野王云王者恩加壽考則白兔見協太陰之瑞  
實表坤慈應千載之祥雅符乾德伏以皇帝陛下膺圖纂

嗣壓組騰休紹祖宗之丕基示孝慈於衆彙敦禮耆老委  
任勲賢所以致八孔之效靈應三秋而發皓來從月窟疊  
霜毳以蒙茸獻自梁庭粲冰毫而皎潔足以增輝瑞牒歸  
美皇猷聞天遠自於元勲拭目共觀於多士豈比魯傳趙  
郡獨歌如練之詞實同晉獲壽春又繼凝鉛之詠

爲王尚書遺表

臣某聞死生者天地之常數忠孝者臣子之本心某孝未  
立於家忠未報於國而桑榆遽迫風燭俄驚雖修短之分  
偶然而古今之歎一也臣受性頑疎昧於攝理常服石乳

頗厯歲年始自去冬微覺發動皇慈軫念睿渥旁流特賜  
祕方兼傳要訣王人薦至驛騎載馳竊見聖心密聞天語  
方驗君臣之藥旋收瞑眩之功碎首微軀無階上答將謂  
載安營魄更長皮膚得霑雨露之慈可延犬馬之命不悟  
才微任重福過災生從此月十二日已後舊疾再發氣緒  
羸憊心慮沉緜徒加藥餌竟未瘳損自二十二日已後轉  
覺危惓生意寂寥視陰恐盡渴日不足臣自揣度必難保  
全雖覆載所容亭育之恩至廣且鬼神不捨膏肓之計已  
成永辭明聖憂在漏刻臣自荷深恩謬居方鎮三承寵命



六變星霜撫俗臨戎幸無敗闕此皆陛下聖謨宏貸元貺  
昭宣誓欲乘此遭逢少施勞効使千載之後知聖代有守  
土之臣焉永懷楊僕之移關常念子牟之戀闕是以仍歲  
抗表備述本誠瞻望軒墀冀獲朝覲儻丹誠曲遂元鑒俯  
從則臣此生沒齒無恨豈意隱隱爲咎至誠不通徒知生  
也有涯何遽死之將至行潦微波望朝宗而先竭衰楊弱  
質待歲寒而已凋無由假魯陽之戈空想結杜回之草伏  
惟聖念俯察哀懷仰天無聲伏表流涕無任感戀欷歔之

至

代鄜州太守賀赦表

臣某言伏奉月日制書大赦天下鴻恩至德曠古無鄰喜  
氣休聲韶光共茂化流海內澤及荒陬震雷作解於九霄  
渙汗霑敷於萬國生靈交感動植增榮中賀伏惟陛下天  
覆地載昭升聖謨執契垂衣財成庶品搜百王之墜禮舉  
三代之嘉猷明達四門駿奔九有揭天綱以齊衆理運斗  
極以示羣方精微於元造之源拯救於蒼生之弊釋縲械  
於囹圄徵遺逸於邱園矜水旱所沴之方慎牧宰重難之  
選蠲苛已責崇德報功有典必禋無文咸秩普天率土飛

翔所加俱臻仁壽之鄉場一作

共戴乾坤之德臣忝承戎寄

職列藩隅雨露之恩草木同慶

請更定選曹事例表

同光四年三月

諸道州縣皆是攝官誅剥生靈漸不存濟此蓋郭崇韜在  
中書日未詳本朝故事妄被閒人獻疑點檢選曹曲生異  
議行矯枉過直之道成欲益反損之文共選人凡關一事  
闕違並是有涉踰濫或告赤欠少或文字參差保內一人  
不來五保皆須並廢文書一紙有誤數任皆不勘詳且自  
天下亂離將五十載無人不遇兵革無處不遭焚燒性命

脫免者尚或甚稀文書保全者故應極少其年選人及行事官一千三百餘員得官者纔及數十皆以踰濫爲名盡被焚毀棄逐遂令選人或斃踣於旅店或號哭於行途萬口一詞同爲怨酷臣等項曾商議堅確不迴以致二年以來選人不敢赴集銓曹無人可注中書無人可除去年闕近二千授官不及六十乃致諸道皆是攝官朝廷之恩澤不行搢紳之祿秩皆廢銜冤負屈不敢申陳列局分曹莫非僥倖且攝官只自州府多因賄賂而行朝廷不知姓名所司不考課績皆無拘束得恣貪殘及有罪名又不申奏

互相掩蔽無迹追尋遂使人戶流移州縣貧困日甚一日  
爲弊轉多若不直具奏聞別爲條例不惟難息時病兼且  
益亂國章臣等商量伏請特降勅文宣布遠邇明言往年  
制置不自於宸衷此日焦勞特頒於睿澤兼以選曹公事  
情僞極多中書條流亦恐未盡望以中書所條件及王松  
等所論事節並與新定選格有輕重未盡處並委銓曹仔  
細點檢酌量但可以去其踰濫草彼弊訛不失本朝舊規  
能成選曹永例者務在酌中以爲定制

請建宗廟表

天福二年正月

皇帝到京未立宗廟者夫以受命握圖既啟無疆之祚宗  
文祖武宜遵有國之規伏惟皇帝陛下厯數在躬艱難創  
業拯黔黎之塗炭廓宇宙之氛霾寰區既定於一戎基構  
方開於萬祀恭惟宗廟須切追崇將示肅恭豈宜稽緩臣  
等商量望令所司速具制度典禮以聞尊始敬先既光於  
太后徽章茂典永顯於洪猷

上嘉慶節表

乾祐元年  
十二月

色變長瀾肇皇靈之寶構光流華渚開聖緒於瑤圖莫不  
慶洽同文光昭大象刻玉波沿於鳳紀鳴金颺振於洪猷

所以顥氣凝空編爲令典神光燭夜允叶昌期皇帝陛下  
守位以仁繼明以德化敷有感慶洽無疆當九龍洽聖之  
辰是五緯聯光之夕凡蒙地載共祝天長皇帝三月九日  
誕聖請以其日爲嘉慶節休假三日羣臣宴樂上壽

上永壽節表

廣順元年六月

恭以少昊乘乾曳祥虹於華渚軒轅出震流瑞電於樞星  
所以玉牒表天地之禎金策纂皇王之異仰惟聖德允叶  
昌期伏惟聖帝陛下德輝三五道煥古今開階成周室之  
昌啟運得堯基之典豈可使方濁澄明之狀未顯洪名園

清燦爛之文不章懿號臣等傾誠紫禁都慶丹邱願隆百代之基冀正萬年之祚臣等請以七月二十八日皇帝降聖日爲永壽節羣臣上壽內外宴樂

上天清節表

顯德元年七月

伏以壽邱降跡爰符出震之期里社應祥式契乘乾之運頃觀舊史抑有彝章幸當載誕之辰仰奉延洪之稱伏惟皇帝陛下道超九聖祚啟千齡紹文武之耿光比成康之迪哲自登天寶益顯聖功運龍韜而親御戎車仗金鉞而立平賊寇破幽并之妖孽救澤潞之生靈觀兵而直抵晉



陽奮武而遠臨代北元兇假息雜虜摧鋒還京闕而契人心謁園陵而伸孝道飲至纔踰於旬日覃恩已被於八方四塞關山漸息烟塵之警萬邦臣妾咸登仁壽之鄉今則候屬澄河時當降聖是甲觀懸弧之日乃銅律禦戶之時鰈水鷦林望堯雲而獻祝桓圭穀璧趨禹會以駿奔臣等叨遇休明俱塵祿位荷君父巍巍之德伸臣子悽悽之誠祇率典謨尊奉宸極臣等不勝大願謹以九月二十四日降誕日奉上節名爲天清節所冀金相玉振貞寶厯以彌新地久天長煥青編而不朽

爲李諫議賀赦表

臣某言伏奉今月二十四日制書大赦天下恩覃九有化

被萬方至仁與陽和並舒大霈

一作霈澤

隨雨露偕潤凡在品

彙莫不昭蘇臣某中賀臣聞天地功成是先煦育皇王立  
極必洽好生所以書著眚災傳稱肆赦將其更始咸與惟  
新廓氛霧於八紘澡塵霾於四裔幽隱有感動植懷恩朝  
野交歡率土胥慶恩覃有截惠及無垠固天縱之知四門  
已闢闡日躋之敬百度惟貞澡雪舊痕蕩除宿負宥赭衣  
之罪得辨平人洗白玉之瑕復爲重寶唯才是急仄席搜

揚阜俗爲期常賦蠲滌悉中賦以贍經費罷別進以息疲  
黎錫死事之官封幽明知感禮高年之粟帛老幼又安班  
爵以勞動敘親以修睦貔貅之士累洽恩私搢紳之徒同  
榮慶賞返縲囚於異域出幽閉於深宮感人心而禮定體  
乾道而化光澤及華夷仁霑草木含生之類孰不欣懽歌  
一德之心邇遐齊貫傳萬國之慶上下同聲祥光若浮瑞  
氣可覽億兆所未見古今所罕聞臣某備列班榮親覩盛  
禮踴躍兢抃倍萬恒情無任慶悅之至

欽定全唐文卷九百六十四目錄

闕名 五

定朔請從李淳風議奏

請忌日仍理軍務奏

升祔後請肄樂奏

請停親拜嶽瀆奏

上劉子元議孝經老子註易傳奏

上司馬貞等議孝經老子註易傳奏

請仍用冬至日受賀奏

長至祥瑞奏

請移植三脊茅奏

駁請移植三脊茅奏

老人星見奏

老人星見奏

覆舅母服制奏

千秋節祥雲見奏

南北郊祥瑞奏

上慶雲奏

議加文列庚桑爲真人奏

請頒賜洞靈等三經奏

請旌表董思寵奏

請禁諸州借使度支錢物奏

請免田希鑒後嗣死罪奏

定追葬沈太后儀注奏

請選人兼用兩考奏

請令浙東西依稅限納當錢奏

澄清選例奏

公除赴祭奏

請有罪奪實封奏

請臺司增置法直員額奏

定承襲食封奏

請給六品已下左降官祿料奏

請三年一造職田文簿奏

請收市銅物鑄錢奏

請添借百司本錢奏

請令納課陪厨戶等人歸府縣奏

請選儒臣赴學講論奏

請肅朝儀奏

請時享月停薦食奏

請停實估奏

處分盜罪奏

請准舊例分察尚書省奏

禁額外徵錢奏

論避皇太子名諱奏

請舉館驛舊制奏



欽定金唐文卷九百六十四

闕名 五

定朔請從李淳風議奏

貞觀十四年

伏見李淳風表稱古厯分日起於子半勘得今歲十一月  
當甲子合朔冬至故太史令傅仁均欲苟異張胄元法減  
餘稍多于初爲朔遂差三刻用乖天正又南宮子明薛頤  
等並云子初及半日月未離淳風子午之法推校春秋以  
來晷度薄蝕事皆符合奉勅付所司及公卿詳加考定謹  
與國子祭酒孔穎達等一十一人尚書八座參議得失惟

仁均定朔事有微差淳風推校理尤精密請從淳風議

請忌日仍理軍務奏

貞觀十九年五月

禮云君子有終身之憂而無一朝之樂此所爲星迴改歲親沒同辰思其居處不可爲樂自大駕南轅晉徒東徙或增名似之節而出典彛之外既乖俯就流若不歸

疑

襄公

擊殽陵而墨繅伯禽赴徐戎而變

闕

金草之事無所不通

伏惟陛下親御六軍已登寇境戎務繁擁伏待剖斷不可以遵先聖之常經畧近代之公議請今月六日所有軍機要切百司依式奏聞

升祔後請肄樂奏

永徽元年正月

依禮祀郊廟皆奏宮懸比停數習恐致廢忘伏尋故實兩漢升祔之後庶事如故國之大禮祀典爲先今旣踰年禮宜從吉若不肄習實慮不調誠敬有虧致招罪責

請停親拜嶽瀆奏

證聖元年有司

伏以天子父天而母地兄日而姊月於禮應敬故有再拜之儀謹按五嶽視三公四瀆視諸侯天子無拜公侯之禮臣愚以爲失尊卑之序其日月以下請依舊儀五嶽以下署而不拜

上劉子元議孝經老子註易傳奏

開元初中  
書門下

劉子元奏註孝經請廢鄭依孔註老子請停河上公行王  
易傳非子夏所造者子元博識誠則純儒全非衆家亦則  
未可且孝經鄭義行已多時老子河註用亦云久并子夏  
易傳文不折於片言望並付所司令諸儒與子元對質定  
必須理勝義成不得飾詞爭辨論定聞奏

上司馬貞等議孝經老子註易傳奏

開元初  
禮部

臣等議稱今文孝經是漢河間王所得顏芝本劉向以本  
參較古文省煩除惑定爲此一十八章其註相承云是鄭

元所作而鄭志及目錄等不載故往賢共疑焉惟荀昶范  
煜以爲鄭註故昶集解孝經具載此註而其序云以鄭爲  
主是先達博選以此註爲優且其註縱非鄭氏所作而義  
亦敷暢頗將爲得雖數處小有隱實亦未爽經通其古文  
二十二章元出孔壁先是安國作傳後遭巫蠱代未之行  
荀昶集註之時尚有孔傳中國遂亡其本近儒欲崇古學  
妄作此傳假稱孔氏輒穿鑿改更僞作閨門一章劉炫詭  
隨妄稱其善且閨門之義近俗之語必非仲尼正說按其  
章云閨門之內具禮矣乎嚴親嚴兄妻子臣妾繇百姓徒

役之句凡鄙不合經典又分庶人章從故自天子以下別爲章乃加子曰二字然故者連上之詞既爲章首不合言故是古文旣亡後人妄開此等數章以應二十二章之數非但經文不真抑亦傳文淺僞又註云因天之時就地之利暴其肌體朝暮從事露髮塗足少而習之其心安焉此語雖旁出諸子引之爲註何言之鄙俚乎與鄭元所云分別五土視其高下高田宜黍稷下田宜稻麥優劣懸殊曾何等級今議者欲取近儒詭說殘經缺傳而廢鄭註理實未可望請准令式考經鄭註與孔傳依舊俱行又得議稱

老子道德者是謂元言註家雖多罕窮厥旨河上蓋愚虛  
之號漢史實無其人然其註以養神爲宗以無爲爲體其  
詞近其理宏小足以修身潔誠大可以寧人安國故顧歡  
曰河上公雖曰註書卽史立教皆沒畧遠體指明近用斯  
可謂知言矣王輔嗣雅善元談頗採道要窮神明乎橐籥  
守靜默於元牝其理暢其旨微在於元學頗謂所長至若  
近人立教修身宏道則河上爲得今望請王河二註令學  
者俱行又得議稱謹按劉向七畧有子夏傳但此書不行  
已久今所存者多失真本又荀勗中經簿子夏傳四卷或

云丁寬所作是先達疑非子夏矣又隋書經籍志云子夏傳殘缺梁氏六卷今兩卷是其書錯謬多矣王儉七志引劉向七畧云易傳子夏韓氏而載薛虞記又今祕庫有子夏傳薛虞記其傳文質畧指輒非遠無益後學不可將帖正經伏奉今年三月十日勅曰孝經者德教所先自則天以來獨宗鄭氏遺旨今則無文又子夏易傳近無習者輔嗣註者亦甚甄明諸家所傳元有得失獨據人說能無短長令儒官詳定所長令明經者依習若將理等亦可兼行其作易者兼帖子夏易傳詳其可否奏聞者又奉四月九



日勅曰太子左庶子劉子元奏孝經註請廢鄭依孔老子  
註請停河上公行王輔嗣易傳非子夏所造者付臣所司  
令諸儒與子元對質定詳必須理勝義成不得飾詞爭辨  
者臣等與國子博士司馬貞太學博士郗嘗通等十人對  
如前

請仍用冬至日受賀奏

開元八年九月  
中書門下

伏以十四日冬至一陽初生萬物潛動所以自古聖帝明  
王皆以此日朝萬國觀雲物禮之大者莫逾是時其日亦  
祀圜丘令攝官行事質明既畢日出視朝國家以來更無

改易緣新修條格將畢其日祀園丘遂改用立冬日受朝  
若親拜南郊受賀須改旣令攝祭理不可移伏請改正

長至祥瑞奏

開元十一年十一月太史局

平明陰雲祁寒及其日出有雲迎日又有祥風至須臾日出有黃白冠及日南有珥臣謹按黃帝占云冬至之日陰雲祁寒來歲大稔人安五穀豐熟又曰風不及地和緩而來謂之祥風王者德至於天則祥風起日冠且珥人主有嘉並太平之嘉應臣請宣付所司

請移植三脊茅奏

開元十三年四月

昔齊桓公九合諸侯一正天下將欲封禪問於夷吾夷吾對曰江淮間三脊茅生用以縮酒乃可封禪其時無茅桓公大慙而罷自厯千古今始一生昔宣王南征責楚包茅不入王祭不供則是其地生茅今高一尺至七八月長足方堪縮酒特望聖恩至時令采用祭泰山并根掘取苑內植之

駁請移植三脊茅奏

開元十三年宰臣

管夷吾爲桓公是諸侯不合封禪故稱茅拒之及伐楚之日尊周室行霸道乃責楚云包茅不入王祭不供若以茅

爲瑞是不知經義臣等歷任荆楚博訪貢茅沅江最勝臣  
已牒岳州取訖今稱撫州有茅請移根入苑且貉不踰汶  
橘不過江移根苑中信是虛語望勅撫州且進六束與沅  
江相比用之

老人星見奏

開元二十一年  
八月太史局

臣謹按春秋文曜鉤云王者安靜則老人星臨其國主壽  
昌萬人安常以秋分節候之南郊今應期而見請付所司

老人星見奏

開元二十四年  
八月太史局

臣謹按春秋文曜鉤王者安靜則老人星見孫氏瑞應圖

云王者承天則老人星見臨其國又黃帝占云老人一名  
壽星色黃明大則主壽昌天下多賢士伏惟陛下以千秋  
節日記於星壇而祭期將臨美應先至知歷數之方永嘉  
萬壽之昌期請付史官以光典策

覆舅母服制奏

開元二十四  
年中書門下

頻奉墨制重令詳議臣等淺陋不達不敢措詞聖旨深微  
特垂開曉陛下體至仁之德廣推恩之道將宏引進以示  
睦親再發德音更令詳議謹按大唐新禮親舅加至小功  
與從母同服此蓋當時特命不以輕重遞增今聖制親姨

舅小功更制舅母總麻堂舅袒免等服取類新禮垂示將來通於物情自我作古羣儒凡議徒有稽留並望准制施行

千秋節祥雲見奏

開元二十五年八月太史局

今日卯時有祥雲出東方及其樂作非烟燭於西北巳午之時日有抱戴伏以陛下聖厯方永福履無疆洵臻嘉瑞之符載洽繞樞之日臣等不勝抃躍請宣付史館

南北郊祥瑞奏

開元二十五年十月太史局

今日陛下虔報豐稔昭祭神祇臣謹候天地清謐星辰明

朗初祭則樽俎適陳祥風拂地旣奠之後瑞氣縈壇其風則暢和緩之候其氣乃蓄龍鳳之色臣謹按王者德至於天則祥風起又堯沈璧於河休氣四塞伏惟陛下一德馭物而天祥薦祉盡皇王之靈貺躋蒼生於仁壽請宣付所司編入史冊

上慶雲奏

天寶元年正月太史局

今旦卯時日有紅碧黃氣數見及紫赤雲氣潤澤鮮明在日上謹按瑞應圖名曰慶雲太平之應請編入史冊

議加文列庚桑爲真人奏

天寶元年三月中書門下

莊子既號南華真人文子請號通元真人列子號沖虛真人庚桑子號洞靈真人其數子並望隨號稱經

請頒賜洞靈等三經奏

天寶元年五  
月中書門下

兩京及諸郡崇元學生等准開元二十九年正月制前件人合習道德及南華通元沖虛等四經又准天寶元年二月制改庚桑子爲洞靈真經准諸條補崇元學亦合習讀伏准後制合通五經其洞靈真經人間少本臣近令諸觀尋訪道士全無習者本旣無廣業實難成并通元沖虛二經亦恐文字不定元教方闡學者宜精其洞靈等三經望



付所司各寫十本較定訖付諸道採訪使頒行其貢舉司  
及兩京崇元學生亦望各付一本今冬崇元學人望且准  
開元二十九年正月諸條考試其洞靈真經請待業成後  
准式

請旌表董思寵奏

大曆七年十一月京兆府

櫟陽縣人董思寵五代同居子孫凡八十餘人友愛敦睦  
鄉里稱之天寶末寇盜剽掠村閭此家獨全年遭水旱此  
家獨免至於征稅每先於人伏望旌表門閭編諸史冊

請禁諸州借使度支錢物奏

建中元年五月度支

諸色錢物及鹽井利等伏緣財賦新有釐革支計闕供在  
臣職司夙夜憂負今後望指揮諸州若不承度支文牒輒  
有借使及擅租賃迴換本州府錄事參軍本縣令專知官  
並請同入已枉法贓科罪庶物無乾隱事有條流其應合  
徵收諸色錢物所由官有違程限致闕軍須請停給祿料

請免田希鑒後嗣死罪奏

興元元年十月  
中書門下

李晟巡邊欲至涇州田希鑒潛伏兵馬謀害統帥李晟察  
其奸計今已伏辜原其情狀合坐宗族頃以朱泚窮蹙奔  
竄涇原希鑒去逆歸順閉門不納恐須錄其前効特全後

嗣其妻王氏并男太子通事舍人華左金吾倉曹參軍葦  
折衝芮折衝萱等并請免死差綱遞送嶺南分付杜佑令  
配諸州

定追葬沈太后儀注奏

貞元元年九月禮儀使

太皇太后沈氏厭代登真於今二十有七年大行皇帝至  
孝惟深哀思罔極建中初已發明詔舟車所至靡不週遍  
歲月滋深迎訪理絕謹按晉庾蔚之議云尋求三年之外  
又俟中壽而服之今參詳禮經博稽故事伏請以大行皇  
帝啟攢宮日百官舉哀於肅章門內之正殿先令有司造

禕衣一副發哀日令內官以禕衣置於幄座自後令宮人朝夕上食先告元陵次告宗廟上太皇太后謚冊次造神主擇日祔代宗廟其禕衣備法駕奉遷於元陵祠殿置於代宗皇帝衮衣之右便以今年十一月二日發哀爲忌追冊曰睿眞皇后

請選人兼用兩考奏

貞元二年三月吏部

准今年二月十三日勅除臺省常參官餘六品以下並准舊例都付本司處分者其六品以下選人中有人材書判無闕相當承前准格皆送中書門下又立功狀奏請要有

裒揚等令並委本司注擬即不同常格選人若無闕相當  
一一令待續闕事即停滯必招喧訴應緣功狀及非時與  
官合授正員額內并選限內無闕注擬者伏請量事計日  
用成三考闕如臨時人數稍多注擬不足灼然須處置發  
遣即請兼用兩考以上得資闕并量人材資敘注擬訖准  
勅送中書門下詳定可否其六品以下有官資稍高合入  
五品縱非五品亦請依前送名

請令浙東西依稅限納當錢奏

貞元三年閏  
五月度支

浙江東西節度使韓滉自建中年已後供軍資費賞設等

每年續加當錢六十一萬六千貫准今年五月五日勅近日甲兵止息無別徵求此是常稅先有成例宜令浙西觀察使白志貞浙東觀察使皇甫政各據道本元額依舊每年兩稅徵收發遣其錢物到別庫收貯每有給用皆先奏取進止其錢舊例每年六月舉徵如秋限送納今京西師旅頗衆經用尤多望令依稅限納市輕貨送上都

澄清選例奏

貞元四年八月吏部

伏以艱難以來年月積久兩都士庶散在遠方三庫勅甲又經失墜因此人多罔冒吏或詐欺混見官者謂之擘名

承已死者謂之接脚乃至制勅旨甲皆被改張毀裂如此之色其類頗多比來因循遂使滋長所以選集加衆真偽混然實資簡責用澄涇渭謹具由歷狀樣如前伏望委諸州縣府界內應有出身以上便令依樣通狀限勅牒到一月內畢務令盡出不得遺漏其勅請令度支悉付州府州司待納狀畢以州印印狀尾末縫相連星夜送觀察使司定判官一人專使勾當都封印差官給驛遞驢送至省上都五百里內十二月上旬到千里外中旬到每遠較一千里外即加一旬雖五千里外一切正月下旬到盡黔中嶺

南應不合北選人不納文狀限其狀直送吏部曹不用都  
司發人到日所司勘會即姦僞必露冤抑可明如須盤問  
即下所在州縣責狀其隱漏未盡及在遠不及期限者亦  
任續通依前觀察使興送所在勘責必有灼然踰濫事跡  
著明者據輕重作條件商量聞奏庶稍澄流品永息踰濫

公除赴祭奏

貞元六年  
正月吏部

准禮諸侯絕周大夫絕總所以殺旁親之喪不敢廢大宗  
之祭士則總不祭者謂同宮未葬欲人之吉凶不相瀆也  
魏晉以降變禮從權總已上喪假內衣縗謂之喪服假滿



即吉謂之公除凡既葬公除則無事不可故江右潭殷仲堪並云既葬公除廢祭者非也故其時公除者則行公祭蓋大夫不敢以家事辭王事春秋之義也今國家行公除之令既已即吉於祭無嫌私家之祭則無廢者公家之祭則猶禁之是有司限文進退維谷若以服爲禁則懼虧祭禮若以例奏差則懼違令文先王立禮所以進人爲善也立法所以禁人爲非也彼公除者人各思君親莫不欲祭使子得祭其父孝莫大焉臣得祭其君義莫重焉苟祭而不許是禁人爲善也苟私祭不禁則公祭無嫌是則垂之

空文不若行其變禮今請申明舊令使行之可守凡有慘服既葬公除及聞哀假滿者許吉服赴宗廟之祭其同宮未葬雖公除者請依前禁之庶輕重有倫以一王法

請有罪奪實封奏

貞元七年三月戶部

伏以周漢故事有功即加地有罪即奪國既明賞罰方申沮勸其犯除名以上罪有實封准法合除比來因循兼不申舉自今以後應實封人或緣罪犯其堂省及本軍本使本貫奏狀請令並標實封戶數本犯州名同奏勅下戶部以爲憑據其犯法罪三分望奪一分流罪奪一半除名以

上罪即准法悉除並以本犯條論不在減贖之限其奉特勅貶謫驗制詞內所犯無正條者伏請准流罪奪一半

請臺司增置法直員額奏

貞元八年正月御史臺

伏以臺司推事多是制獄其中或有准勅便須處分要知法理又緣大理刑部斷獄亦皆申報臺司儻或差錯事須詳定比來皆却令刑部大理法直簡勘必恐自相扶會縱有錯失無由辨明伏請置法直一員冀斷結之際事無闕遺其糧料請取臺中諸色錢物量事支給其功優等請准刑部大理處分

定承襲食封奏

貞元八年八月

准貞元七年三月二十日勅節文比來食實封人多不依  
令式皆身歿之後子孫自申請傳襲伏請自今以後并今  
日以前應食實封人並一年內准式具合襲子孫官品年  
名并母氏嫡庶於本貫陳牒如無本貫即於食封人本任  
本使申牒如合襲人有罪疾及身死者亦限一周年內申  
牒請立以次合襲人仍俱家口陳牒請附籍帳本貫勘責  
當家及近親如實是嫡長即與責保准式附貫然後申省  
到後即取文武職事三品正員一人充保

請給六品已下左降官祿料奏

貞元十年  
二月刑部

准建中元年正月十七日勅諸州府五品以上正員及額  
內上佐宜四考停其左降官不在此限者五品左降官既  
不許停祿料六品以下未復資已經四考未量移間其祿  
料伏望亦許准給

請三年一造職田文簿奏

貞元十一年  
八月屯田

諸州府送納內外文武官職田及公廨田四至白簿等前  
件簿書准天寶十四年八月十二日勅每年六月十三日  
勘造申省如建本判官牒吏部先用闕本典准法科處者

伏以地段佃戶並無改移隨年造簿實有勞費今請令諸州府及畿內縣三年一送違限者准勅科處

請收市銅物鑄錢奏

貞元十五年  
中書門下

伏准羣官所議鑄錢或請收市人間銅物令州郡鑄錢當開元以前未置鹽鐵使亦令州郡勾當鑄造令若兩稅納匹段或慮兼要通用見錢欲令諸道公私銅器各納所在節度團練防禦經畧使便據元勅給與價直并折兩稅仍令本處軍人鎔鑄其鑄本請以留州留使年支未用物充所鑄錢便充軍府州縣公用當處軍人自有糧賜亦校省

本所資衆力并收衆銅天下併功速濟時用待一年後鑄  
器物盡則停其州府有出銅鉛可以開鑄處具申有司便  
令同諸監冶例每年與本充鑄其收市銅器期限并禁鑄  
造買賣銅物等待議定便令有司條疏聞奏其上都鑄錢  
及收銅器續處分將欲頒行尚資周慮請令中書門下兩  
省御史臺并諸司長官商量重議聞奏

請添借百司本錢奏

貞元二十一年  
七月中書門下

勅釐革京百司息利本錢應徵近親及重攤保并遠年逃  
亡等今年四月十七日勅本利并放訖其本事須借錢添

填都計二萬五千九百四十三貫六百九十九文伏以百  
司本錢久無疎理年歲深遠亡失頗多食料旣虧公務則  
廢事須添借令可支持伏望聖恩許令准數支給仍請以  
在藏庫度支除陌錢充

請令納課陪厨戶等人歸府縣奏

元和二年六月  
月中書門下

伏以聖政惟新事必歸本近又疎理五坊戶邑令府縣却  
收萬情欣喜出望外臣等敢不釐革舊弊率先有司上  
副聖情用宏至理其兩省納課陪厨戶及捉錢人總一百  
二十四人臣當司並不收管望各歸府縣



請選儒臣赴學講論奏

元和二年八月國子監

准勅今月二十四日諸州府鄉貢明經進士見訪宜令就國學官講論質定疑義仍令百僚觀禮者伏恐學官職位稍卑未足飾揚盛事伏請選擇常參官有儒學者三兩人與學官有儒學者庶聖朝盛典輝映古今

請肅朝儀奏

元和二年十月御史臺

文武常參官准乾元元年三月十四日勅如有朝堂相吊慰及跪拜待漏行立失序語笑誼譁入衙入閣執笏不端行立遲慢立班不正趨拜失儀言語微誼穿班穿仗出入

閣門無故離位廊下飲食行坐失儀誼開入朝及退朝不從正衙出入非公事入中書等每犯奪一月俸班列不肅所由指撝猶或飾非即具聞奏貶責臣等商量於舊條每罰各減一半所貴有犯必舉

請時享月停薦食奏

元和三年四月太常禮院

太廟時享及告廟朔望薦食同日謹按禮經祭不欲數伏以太廟禘祫祭禮重於時享准禮時享與禘祫同月即其月但行禘祫不行時享蓋不欲煩是禮先重者今時享重於朔望薦食詳求禮情參酌輕重於時享之月其朔望薦

食亦合便停若兩禮兼行即祭恐煩黷伏請每至時享及臘享但行享禮其月朔望薦食請停餘月一准舊制如告廟日與朔望薦食日同伏請先行告廟禮然後薦食所冀疎數有節合於禮中

請停實估奏

元和四年  
二月度支

諸州府應上供受稅匹段及留使留州錢物等每年匹段估價稍貴其留使留州錢即聞多是徵納見錢及賤價折納匹段既非齊一有損疲人伏望起元和四年已後據州縣官正料錢數內一半任依京官例徵納見錢支給仍先

以都下兩稅戶合納見錢充如不足即於當州兩稅內據  
貫均配支給其餘留使州雜給用錢即請各委州府並依  
送省輕貨中估折納匹段充如本戶稅錢較少不成端匹  
者並任折納絲絲如舊例徵納雜物斛斗支用者即任准  
舊例處分其折納匹段定中估仍委州縣精加揀擇如有  
濫惡所由官并請准今年正月十五日旨條處分應帶節  
度觀察使州府合送上都兩稅錢既須差綱發遣其留使  
錢又配管內諸州供送事頗重疊其諸道留使錢伏請各  
委節度觀察使先以本州舊額留使及送上都兩稅錢充

如不足即於管內諸州兩稅錢內據貫均配其諸州舊額供使錢即請隨夏稅旨限收送上都度支收入次年旨符便爲定制伏以諸道兩稅徵斂不常閭井之間頗聞困弊臣今類會如前

處分盜罪奏

元和四年二月京兆府

准建中三年三月勅節文當府界內捉獲強盜不論有賊無賊及竊盜賊滿三匹以上者並准勅集衆決殺不滿匹者量事科決補充所由犯盜人雖有官及屬軍等一切並依此例處分准天寶十四年正月勅府縣務煩事須疏決

若一一皆待勘覆即必有稽留伏准今年正月勅自今以後諸司應有決殺囚若不承正勅並不在行決之限如跡涉兇險須速決遣并特勅處分者亦宜一度覆奏者伏以京邑浩穰庶務煩劇擒姦戮盜事實尋常若一罪一刑動須覆奏不惟懼於留獄實亦煩於聖覽況畿甸之內尤須肅清其強盜竊盜并犯徒以下罪情准建中三年及天寶十四載勅處分其餘罪犯經有司准按者請准今年正月勅處分

請准舊例分察尚書省奏

元和四年五月御史臺

准舊例監察御史從下六人各察尚書省一司又准興元元年十月勅令監察從上第一人察吏部禮部第二人察兵部工部第三人察戶部刑部者伏以監察第一第二人已充監察及館驛等使新人除出使外並無職掌無以觀其能否今請守舊制新人分察

禁額外徵錢奏

元和五年正月度支

諸州府見錢准勅宜於管內州據都徵錢數逐貫均配其先不徵見錢州郡不在分配限都配定一州見錢數任刺史著百姓隱便處置其勅文不加減者即准州府所申爲

定額如於勅額見錢外輒擅配一錢及納物不依送省中  
估刺史縣令錄事參軍請與節級科貶

論避皇太子名諱奏

元和五年二月太常禮院

百官避皇太子名諱詳禮經公卿大夫與太子同名無嫌  
蓋尊統於上太子同在臣子之列國朝故事東宮官號并  
東宮殿及門名與太子名同皆改然無百官避東宮名者  
德宗在春宮處州舊名不改并御史院同姓名者亦不改  
伏以宮臣名及宮殿門名并百官宗姓中有與皇太子名  
同者即干儀制禮合迴避臺官及王公爵土名號推義比



例並無改文

請舉館驛舊制奏

元和五年四月御史臺

御史出使及却迴所在館驛逢中使等舊制御史到館驛已於上廳下了有中使後到即就別廳如有中使先到上廳御史亦就別廳因循歲年積爲故實訪聞近日多不遵守中使若未諳往例責欲逾越御史若不守故事懼失憲章喧競道途深乖事體伏請各令遵奉舊例冀其守分